

आकाशवाणी जयपुर-अजमेर
प्रादेशिक समाचार
दिनांक : 16.06.2026 समय : 18.45 बजे

- केन्द्रीय कृषि मंत्री शिवराज सिंह चौहान कम बारिश री शंका वाळा ज़िलां री पिछाण कर र फसलवार कंटीजेंसी प्लान तैयार करण बाबत् कह्यो
- 21 जून ने ओजू व्हेवण वाळी नीट-यूजी परीक्षा ने ध्यान राखता थकां सोशल मीडिया प्लेटफॉर्म-टेलीग्राम माथे ऑनलाइन संदेश भेजण परां 22 जून ताई रोकं
- राज्य मांय ई-श्रम पोर्टल माथे हाल ताई 1 करोड़ 54 लाख ऊँ बत्ता नाम मण्डायी ज्या-82 लाख ऊँ बत्ती महिला मजूर शामिलं
- प्रदेश मांय व्ह्या न्यारा-न्यारा हादसां मांय 10 जणां री मौतं

000

केंद्रीय कृषि मंत्री शिवराज सिंह चौहान खरीफ 2026 री तैयारियां सारू आज नई दिल्ली मांय आला दर्जा रा अहलकारां सागे मीटिंग कीनीं ई दौरान कृषि मंत्री कम बिरखा री शंका वाळा ज़िलां री ओळखाण कर र फसलवार तैयारी करण सारू कह्यो कृषि मंत्री फसलवार लक्ष्य, बुवाई री प्रगति अर राज्यवार तैयारियां रो जायजो लीनों वे कपास री उपज बधावण अर दलहन आत्मनिर्भरता मिशन रा बारा मांय ई चर्चा कीनीं

000

सुप्रीम कोर्ट रा मुख्य न्यायाधीश सूर्यकांत अर न्यायमूर्ति वी. मोहना री पीठ भारतीय विशिष्ट पहचान प्राधिकरण कानी ऊँ जारी करी ज्या आधार कार्ड रो बेजा इस्तेमाल नागरिकता अर रहवास रा पता रा सबूत रा तौर ऊँ करण रा आरोप वाळी एक अर्जी माथे सुणवाई करता थकां आज केंद्र अर राज्यां ऊँ जवाब तलब कीनो हैं अर्जी मांय आधार नम्बर ने केवल पहचान सत्यापन रा कागज रा तौर ऊँ ई काम लेवण रो हुकम देवण री अरज करी ज्यी हैं

000

प्रधानमंत्री नरेंद्र मोदी जी-7 शिखर सम्मेलन मांय शामिल व्हेवण सारू फ्रांस रा एवियो पूग गया हैं श्री मोदी लगातार सातवीं दफा जी-7 सम्मेलन मांय भाग ले रहया है, जद के भारत इण मांय 13वीं दफा शिरकत कर रहयो हैं सम्मेलन मांय प्रधानमंत्री मोदी विकासशील देशां रो पक्ष अर चिंतावां री बात रखेलां श्री मोदी नई भागीदारी बनाना और अंतरराष्ट्रीय एकजुटता पुनःस्थापित करना मुद्दा वाळा कार्य सत्र मांय ई शामिल व्हेलां सत्र मांय जी-7 देशां अर भागीदार देशां रा नेता, विश्व बैंक अर अफ्रीका विकास बैंक रा नुमाइंदा शामिल व्हेलां श्री मोदी कनाडा रा प्रधानमंत्री मार्क कार्नी, ब्रिटेन रा प्रधानमंत्री कीर स्टारमर अर संयुक्त अरब अमीरात रा राष्ट्रपति शेख मोहम्मद बिन जायद अल नाहयान सागे ई मुलाकात करेलां

000

21 जून ने ओजू व्हेवण वाळी नीट-यूजी परीक्षा सारू लारला चौबीस घंटा मांय 10 लाख ऊँ बत्ता उम्मीदवार प्रवेश पत्र डाउनलोड कर लीना हैं राष्ट्रीय परीक्षा एजेंसी-एनटीए रे मुजब परीक्षा मांय साफगोई बधावण अर पेपर लीक री शंका खत्म करण सारू सरकार 22 जून ताई टेलीग्राम एप्लीकेशन रे जरिये ऑनलाइन संदेश भेजण माथे रोक लगा दीनी हैं

एनटीए रे मुजब आ रोक नीट री परीक्षा रा दिन वां रे तुरत बाद ताई लागू रहवेलां एनटीए रे मुजब सोशल मीडिया प्लेटफॉर्म टेलीग्राम ने 30 जून ताई पैली ऊँ पोस्ट करी ज्या संदेश एडिट करण रो सुबीतो बहाल नी करण सारू करी ज्यो हैं प्रदेश मांय ई नीट-यूजी परीक्षा साफगोई सागे करावण सारू जरूरी तैयारियां करी जा रही हैं जयपुर रा ज़िला कलेक्टर संदेश नायक बतायो के परीक्षा केन्द्रां

माथे कानून व्यवस्था, परीक्षा सामग्री ने हिफाजत सागे पूगावण अर यातायात प्रबंधन सारू पुख्ता बन्दोबस्त कर्या जावेलं

000

केन्द्र सरकार सोशल मीडिया माथे चाल रही ई-20 ईंधन काम लेवण वाळी गाड़ियां रा बीमा दावा खारिज करण वाळी खबर ने गलत बतायी हैं पत्र सूचना कार्यालय री तथ्य जांच इकाई साफ कीनो है के ई-20 ईंधन काम लेवण वाळी गाड़ियां री मोटर बीमा पॉलिसियां वैध हैं

000

राज्य मांय ई-श्रम पोर्टल माथे हाल ताई एक करोड़ 54 लाख ऊं बत्ता मजूर नाम मंडा लीना हैं आं मांय 82 लाख ऊं बत्ती महिलावां अर 72 लाख ऊं बत्ता पुरुष मजूर शामिल हैं राज्य री श्रम शक्ति मांय महिलावां री तादाद करीब साढे 53 फीसदी है जो माली अर सामाजिक हलका मांय महिलावां री बधती भागीदारी बतावे हैं ई-श्रम पोर्टल माथे नाम मंडायोडा मजूर एक क्लिक कर र केई सामाजिक सुरक्षा योजनावां ऊं जुड़ सके हैं ओ पोर्टल मजूरां ने पेंशन, बीमा, स्वास्थ्य अर रेहवास समेत न्यारा-न्यारा सुबीता ऊं जोड़े हैं

000

इण्डिया स्टोन मार्ट-2028 सारू रीको अर लघु उद्योग भारती बीचे आज जयपुर मांय करार माथे सही करी ज्यी ई मौके उद्योग मंत्री राज्यवर्द्धन राठौड़ कह्यो के राज्य मांय भाटा अर शिल्प री कोई कमी नी है पण इण ने ओळखाण देवण री जरूरत हैं वे कह्यो के स्टोन मार्ट भाटा रा कारोबार सारू दुनिया रा खास मंच रा तौर ऊं सामी आयो हैं

राज्य मांय लारला 24 घंटां मांय व्ह्या न्यारा-न्यारा हादसां मांय 10 जणां री मौत व्हे गयीं बारां जिला रा छबड़ा हलका मांय पार्वती नदी मांय डूब जावण ऊं चार जणा री मौत व्हे गयीं पुलिस रे मुजब अ लोग मध्यप्रदेश मांय गुना रा रहवासी हा अर छबड़ा कने गुगोर मांय एक ब्याह मांय शामिल व्हेवण सारू आया हैं बालोतरा जिला मांय पाटौदी गांव कने आज रोड़वेज री बस अर कार री टक्कर रे कारण चार जणा री मौत व्हे गयीं मरण वाळा चार ई जणा कार मांय सवार हा जो एक ही पिरवार रा हां पाली-जोधपुर हाई-वे माथे मंडिया बाईपास कने एक बेकाबू कार सड़क रा डिवाइडर ऊं टकरा जावण रे कारण दो जणां री मौके ई मौत व्हे गयी जद के एक महिला घणी जखमी व्हे गयी जिण ने पाली रा बांगड अस्पताल मांय भर्ती करायी ज्यी हैं भिवाडी मांय एक कारखाना मांय बणाया जा रह्या हौद री भीत ढस जावण ऊं तीन बच्चां री मौत व्हे गयी अर तीन बच्चा घणा जखमी व्हे ग्यां काल दोपहरां व्ह्या ई हादसा मांय एक बाळक री काल ई मौत व्हे गयी ही जद के दो बाळक आज दम तोड़ दीनों

000

भारतीय जनता पार्टी रा राष्ट्रीय महामंत्री सुनील बंसल कह्यो है के नीट पेपर लीक मामला मांय दोषियां रा खिलाफ कार्यवाही करी ज्यी है अर मामला री जांच करी जा रही हैं वे आज कोटा मांय खबरनवीसां सागे बातचीत कर रह्या हां श्री बंसल केन्द्र मांय एनडीए रा राज रा 12 साल री उपलब्धियां रो जिक करता थकां इण ने बदलता भारत री तस्वीर बतायों

मंत्री मदन दिलावर अर हीरालाल नागर ई पत्रकार वार्ता रे दौरान मौजूद हां भारतीय जनता युवा मोर्चा रा राष्ट्रीय अध्यक्ष तेजस्वी सूर्या ई आज जोधपुर पूग्यां वे प्रबुद्धजन सम्मेलन मांय कह्यो के मौजूदा दौर मांय जाणकारियां तेजी ऊं पसरे है अर बेहतर प्रौद्योगिकी रा दौर मांय गांव-ढांणी मांय बैठ्या लोग ई आखी दुनिया रा हालात री जाणकारी राखे हैं खबरनवीसां सागे बातचीत करता थकां सूर्या कह्यो के केन्द्र सरकार पेपर लीक रा वाक्यां माथे रोक लगावण सारू करडा जतन कर रही हैं वे केन्द्र मांय एन.डी.ए. रा राज रा 12 साल पूरा व्हेवण रा सिलसिला मांय खबरनवीसां ने सरकार री उपलब्धियां री जाणकारी दीनीं

000

मेवाड़ रा महाराणा प्रताप री काल 486वीं जयंती मनायी जावेलं ई मौके राज्यपाल हरिभाऊ बागड़े वां रा संदेश मांय कह्यो के महाराणा प्रताप जबरदस्त हिम्मत रो दरसाव करता थकां मुगलां ने मेवाड़ ऊं

भगा दीना हां श्री बागड़े कह्यो के मायड़ भूमि री हिफ़ाजत सारू वां री लड़ाई हमेशा याद राख्यी जावेलां मुख्यमंत्री भजन लाल शर्मा अर विधानसभा अध्यक्ष वासुदेव देवनानी ई प्रताप जयंती रे मौके शुभकामना संदेश मांय महाराणा प्रताप ने खुद रो माथो ऊंचो राखण सारू सब कुछ निछावर कर देवण वाळा बतायां प्रताप जयंती रे मौके सलूम्वर ज़िला मांय चावंड रा प्रताप स्मारक माथे खास कार्यक्रम राख्यो जावेलां पाली रा धान मण्डी परिसर मांय ई काल महाराणा प्रताप जन्म जयंती समारोह मणायो जावेलां इण ऊँ पैली महाराणा प्रताप रो राज तिलक व्हेवण री ठौड़ गोगुन्दा मांय ई आज खास आयोजन राख्यो जा रह्यो हैं इण मांय शामिल व्हेवण सारू लोकसभा अध्यक्ष ओम बिरला ई गोगुन्दा पधार्यां राजसमंद जिला रा मचीन्द मांय राणा पूंजा पर्यटन स्थल माथे ई प्रताप जयंती रे मौके भरी ज्यो दो दिन रो मेळो आज पूरो व्हे ग्यो

000

मौसम विभाग राज्य मांय आवता चार-पांच दिन तांई प्रदेश रा केई हलकां मांय आंधी अर गरज-चमक सागे बरसात रो सिलसिलो चालतो रहवण रा आसार जताया हैं पश्चिमी विक्षोभ सागे राज्य रे उपर बण्या चक्रवाती तंत्र रे कारण हवा मांय लगातार नमी बण्योड़ी हैं इण ऊँ केई ठौड़ा बरसात व्हेवण रा आसार हैं ई बीचे आज चूरू मांय ज़ोरदार बायरो बाज्यों बीकानेर, हनुमानगढ़, श्रीगंगानगर, जैसलमेर, नागौर, पाली अर फलौदी मांय ई 60 ऊँ 70 किलोमीटर प्रति घंटा री रपतार ऊँ बायरो बाजण सागे अंधड़ चालण री संभावना हैं

000

पांचना बंधा रो पाणी नहरां मांय छोड़बा री मांग करता थकां गैर कमाण्ड हलका रा किसान सवाईमाधोपुर ज़िला रा खण्डीप मांय आज ई धरनो दे रह्या हैं किसान थोड़ी देर तांई दिल्ली-मुम्बई रेलवे लेण ने जाम कर दीनी, जिण ऊ अवध एक्सप्रेस गाड़ी ने थोड़ी दे र तांई रोकणी पड़ीं मौका माथे ज़रूरी पुलिस जाब्तो तैनात करी ज्यो है अर हालात काबू मांय हैं

000